

## **URTARRILAREN 22an**

### **San Bizente, diakonoa eta martiria**



#### **Sarrera-agurra**

Laugarren gizaldi hasierakoa dogu santu martiri hau. Ospe handia izateraino heldu da. Daciano enperadorearen agindupean izan zan eraila 304ko urtean.

Huescan jaioa, loturik eta oinez eroana izan zan Valenciara. Zaragozako gotzainak bere laguntzaile izateko hartu eban bere esan-ezina gainditzeko. Bizente hitz onekoa zan, eta horrexegaitik hartu eutson gorroto Dacianok eta hiltera emon eban.

#### **Sarrera abestia**

##### **BIHOTZ BATEZ ALKARTURIK**

Zugana gatoz, Jauna; Zugana gatoz, Jauna.  
Emoiguzu zure argi grazi ta maitasuna:  
entzun, arren, Jauna.

Altarean aurkitzen da kristau alaitasuna (2).  
Emoiguzu zure argi grazi ta maitasuna:  
entzun, arren, Jauna.

#### **Abadearen agurra**

† Aitaren eta Semearen eta Espiritu santuaren izenean.  
—Amen.

† Jaungoikoak bere Semearen jarraitzaileak, Santuak, emoten deuskuz jarraibide eder. Haren grazia eta bakea zuekin.

—Eta zure espirituarekin.

#### **Damu-otoitza**

Senideok: Bixente diakono martiria eredu emoten deuskun Jainko Aitaren aurrean autortu daigun gure sinismen epelkeria eta hartu daigun haren errukiaren

babesa:

—Jesus Jauna, ahotsa Jainkoa goraltzeko dala  
gogoratzen deuskuzuna: *Erruki, Jauna!*

—Jesus Jauna, Jainkoaren erreinua iragarri zeuzkuna:  
*Kristo, erruki!*

—Jesus Jauna, Erreinua iragartera bialtzen gaituzuna:  
*Erruki, Jauna!*

Erruki dakigula Jainko guztiz ahaltsua, eta gure pekatuak  
parkaturik eroan gaizala betiko bizitzara.

—Amen.

## **Otoitza**

Jainko ahalguztidun betikoa,  
isuri egizu errukitsu gure bihotzera zeure Espiritua,  
eta emoiguzu gainezka maitasun bizia,  
Bizente martiri santuaren antzera  
gorputzeko oinaze guztiak garaitzeko gai izan gaitezan.  
Zure Seme Jesu Kristo gure Jaunaren bitartez,  
Zurekin eta Espiritu Santuarekin batean  
Jainko eta errege bizi da-eta gizaldi eta gizaldietan.

## **Irakurgaia** (2 Kor 4, 7-15)

Esanezina eukan Zaragozako gotzainak hartu eban  
Bixente bere laguntzaile ebanjelioaren iragarpenerako.  
Horixe da gogoratuko deuskuna irakurgai honek:  
iragarpenean sufritu beharra izango dogula, baina ez  
gaituela menperatuko, eta askorentzat izango garala eredu  
eta onuragarri.

*Jesusen bizia agertzen da gure izate hilkor honetan.*

## **San Paulo Apostoluak Korintoarrei egindako bigarren epistolatik**

Senideok: Ministeritzaren altxor baliotsu hau  
buztinezko ontzitan daroagu, argi agertu dadin

honenbesteko indarra Jainkoagandik datorrela, eta ez gugandik. Alde guztietatik estutzen gaitue, baina zapaltzen ez; larri gagoz, baina ustea galduta ez; erasopean bai, baina eskutik itzita ez; lurrera botatzen gaitue, baina hondatzen ez; nonahi eta beti Jesusen heriotza daroagu geugan, Jesusen bizia be gugan agertu dadin.

Bizi garan bitartean, heriotzara garoez beti Jesusegaitik, gure izate hilkor honetan Jesusen bizia be agertu dadin. Holan, heriotzeak dihardu gugan; zuengan, barriz, biziak.

Hau dino Liburu Santuak: «Sinistu neban, eta horregaitik hitz egin neban». Guk be, sinismen-espíritu bera dogula, sinisten dogu eta horregaitik berba egiten dogu, jakinik, Jesus Jauna biztu dauanak biztuko gaituala gu be Jesusegaz, eta honen ondoan ipiniko gaituala zuekin batera. Hau guztia zuen onerako da, Jainkoaren dohaia askorengana zabaltzean, esker ona be askorengan ugaritu dadin, Jainkoaren aintzarako.

Jaunak esana

### Erantzun salmoa (Sal 033)

Badago Jainkoa goresteko eta aintzaltzeko arrazoirik, batez ere haren ontasuna eta indarra ondo-ondoan somatzen danean. Geure otoitz bihurtu daigun salmo hau, eta azaldu daigun Jainkoagan dogula uste ona jarrita.

**Sal 033** *Udaia'24*



Bil - dur guz - ti - e - ta - tik as - ka - tu no - zu Zuk, Jau - na.

**R/. Bildur guztietatik askatu nozu zuk, Jauna.**

Bedeinkatuko dot aldi oro Jauna,

nire ahoan beti haren gorespena.  
Harro nago **Jau**nagaz,  
entzun begie apalek eta poztu beitez. R/.


Handietsi nigaz batera Jauna,  
goratu dagigun alkarregaz haren izena.  
Jaunagana jo neban, eta harek erantzun,  
bildur guztietatik ninduan libratu. R/.

Begirutzen deutsoenak distiratsu egongo go dira,  
ez jake aurpegia lotsaz gorrituko.\_\_\_\_\_  
Dohakabeak dei egin eban, eta Jaunak entzun,  
eta estualdi guztietatik eban salbatu. R/.

Kanpaturik dago Jaunaren aingerua  
hari begirune deutsoenen inguruan, eta libratzen ditu.  
Dastatu egizue eta ikusi zein ona dan Jauna;  
zorionekoa harengan babesten dana.

## **Ebanjelioa** (Mt 10, 17-22)

Inoiz ez da izan erreza Jesusen jarraitzaile izatea. Harek iragarten deuskun Jainkoa ez da geure komenentziakoa, zintzotasuna eta besteen ardurea eskatzen deuskuna baino. Egin deiogun harrerea Aleluia abestuz, zutunik.



Gora Zu, Jainkoa, eskerrak Zuri, Jauna;  
martirien talde zuriz jantziak goratzen zaitu, Jauna. (R/.)

*Agintarien eta erregeen aurrera eroango zaituee Nigaitik,  
autormen egin dagizuen hareen eta jentilen aurrean.*

## **† Jesu Kristoren Ebanjelioa San Mateoren liburutik** Mt 10, 17-22

Aldi haretan, esan eutsen Jesusek ikasleei: «Kontuz

jentearekin! Auzitegietara eroango zaituee eta sinagogetan zigortuko; agintarien eta erregeen aurrera eroango zaituee Nigaitik, autormen egin dagizuen hareen eta jentilen aurrean. Eroaten zaitueenean, ez egon zer eta zelan esango dozuen arduran: une haretan bertan iragarriko deusue Jainkoak zer esan; ez dozue zeuok berba egingo, zuen Aitaren Espirituak berba egingo dau zuen bidez.

Anaiak anaia emongo dau heriotzara, eta aita semea; seme-alabak gurasoen aurka jagiko dira eta hil egingo ditue. Mundu guztiak gorroto izango deusue Nigaitik; baina azkeneraino irauten dauana, horixe izango da salbatua».

Jaunak esana.

## **ESKARIAK**

San Bizente lagun dogula jaso daiguzan gure eskariak Jainkoaren aurrera:

—Eleizearen alde: ebanjelioaganako zintzotasuna bilatu daian, pobreen alde jarritz beti, *eskatzen deusugu, Jauna*.

—Gure gizarte honetan lekuri aurkitzen ez dabenen alde: burua botatean ez daiela pentsatu, senidearen zerbitzuan jartea baino, *eskatzen deusugu, Jauna*.

—Herri agintarien alde: euren ardura betetean, ahulenak ere kontuan izan daiezan, gizarte solidarioa bultzatuz, *eskatzen deusugu, Jauna*.

—San Bizente omentzeko alkatu garanok, geure hitz jarria Jainkoa gorestek eta besteen alde berba ondo egiteko erabili daigun, *eskatzen deusugu, Jauna*.

San Bizenteren hitz jarria baliatuz une guztietan goratu zaiguzala Jainko Aita, besteen alde jokatzu beti. Jesu Kristo gure...

## **EUKARISTIAREN LITURGIA**

### **Eskeintza**

Bedeinkatu zu, Jauna, zeru-lurren Jainkoa, zeure esku za-baletik hartu ditugu orain ekarri deusuguzan ogi-ardauok, lurraren indarrak eta gizakiaren lanak sortuak: honeexek

egin go jakuz biziaren ogi ta betiko zorionaren edari.

**- Bedeinkatua zu, Jauna, orain eta beti.**

Senideok: egin daigun otoitz, guztiok batean, Eliza oso-aren oparia Jaungoikoari eskintzerakoan.

**- Jainkoa gorestekoa eta gizakiak salbatzeko.**

## **Oparien gainekoa**

Jauna, pozez beterik eskeintzen deusugu

gorespen-opari hau:

honen bitartez,

San Bizente martiriaren garaipena ospatzen dogu

eta uste osoz itxaroten

beraren babes zorionekoa izango dogula. Jesu Kristo...

## **Prefazioa**

V./ Jauna zuekin..... R./ Eta zure espirituarekin

V./ Gora bihotzak .....R./ Jaunagan daukaguz

V./ Eskerrak Jaungoiko gure Jaunari...R./ Egoki da eta zuzen.

Egoki da, bai, eta zuzen, bidezko eta salbagarri,

nonahi eta beti guk Zuri eskerrak emotea,

Jauna, Aita guztiz santu,

Jainko ahalguztidun betiko horri.

Kristori jarraituz, Bizente diakonu martiri santuak

zure izena autortzeko isuri eban odolak

argi erakusten ditu zure miragarriak:

gure makaltasunean zeure ahalmena agertzen dozu

eta indartsu egiten indarrik bakoa,

zure testigu izan dadin,

Jesu Kristo gure Jaunaren bitartez.

Horregaitik, zeruko indar guztiekin,

lurrean beti eta beti goresten zaitugu,

Zuri, Jainko guztiz handi horri,

eten barik [esanez] kantatuz: Santu, santu, santua...

### III. Eukaristi-Otoitza

Santu zara, bai, Jauna,  
eta diran guztiek emoten deutsue behar dan gorespena.  
Zure Seme Jesu Kristo gure Jaunaren bitartez  
eta Espiritu Santuaren indarrez,  
Zeuk biziazoten dituzu guztiak eta santutzen  
eta Zeuk diharduzu beti eta beti zeure herria batzen,  
eguzkialde batetik besteraino opari garbia eskeini dakizun.

Apalik, beraz, Jauna, eskatzen deutsugu:  
egin daizuzala santu, zeure Espirituaren indarrez,  
oparitako ekarri ditugun ogi-ardao honeek,  
zure Seme Jesu Kristo gure Jaunaren  
Gorputz eta † Odol egin daitezcan,  
misterio honeek berak agindurik egiten ditugun ezkeror.

Berak, saldu eben gau haretan,  
ogia hartu eta, Zuri eskerrak emonez, bedeinkatu eban,  
zatitu eta bere ikasleei emon eutsen, esanez:

HARTU EIZUE ETA JAN GUZTIOK HONETATIK:  
HAU NEURE GORPUTZA DA-ETA,  
ZUENTZAT EMONGO DANA.

Era berean, afalondoan, kaliza harturik,  
Zuri eskerrak emonez, bedeinkatu eban  
eta bere ikasleei emon eutsen, esanez:

HARTU EIZUE ETA EDAN GUZTIOK HONETATIK:  
HAU NEURE ODOLAREN KALIZA DA-ETA,  
ITUN BARRI ETA BETIKOAREN ODOLA,  
ZUENTZAT ETA ASKORENTZAT  
PEKATUAK PARKATZEKO ISURIKO DANA.  
EGIZUE HAU NEURE OROIGARRI.

**Hau da sinismenaren misterioa.**

Hil eta biztu zarala, Jauna,  
Zu barriz etorri arte, hau dogu, hau, barri ona!

Horregaitik, Jauna, guk,  
zure Semearen nekaldi salbagarria eta hilen artetik biztea  
eta zeruratze miragarria gogoratuz,  
haren azken etorrera itxaroten dogula,  
Zuri eskerrak emoteko eskeintzen deusugu  
sakrifizio bizi eta santu hau.

Begira, Jauna, zeure Eleizearen eskeintza honi;  
ikusi eskeintza honetan  
Zurekin baketu gaituan Jesu Kristoren oparia;  
egizu, Jauna, zure Semearen Gorputza eta Odola  
hartzen ditugunok,  
Espiritu Santuaz beterik, Jesu Kristogan  
gorputz bat eta espiritu bat izan gaitzala.

Berak egin gaizala Zuretzat betiko opari,  
zure aukeratuekin zerua jaritsi daigun:  
lehenengo, Maria guztiz dohatsua,  
Jainkoaren Ama beti Birjinarekin,  
haren senar Jose santuarekin,  
zure Apostolu eta martiri santuekin,  
**Bizente diakonu martgiri** santuarekin eta santu  
guztiekin;  
badakigu, honeen bitartez  
zure laguntza izango doguna nonahi eta beti.

Gu Zurekin baketzen gaituan opari hau izan bedi, Jauna,  
mundu guztiarentzat bake eta salbamen.  
Mundu honetako ibilaldian,  
bete egizu sinismenez eta maitasunez zeure Eleizea:  
zeure zerbitzari Frantzisko gure Aita Santua,  
Joseba gure Gotzaina,  
beste gotzain eta eleizgizon(-emakume) guztiak  
eta zeurea dozun herri osoa.



Entzun, bihotz onez,  
zeure aurrera deitu dozun familia honen otoitzak;  
Aita guztiz ona, erakarri Zeugana  
mundu zabalean banaturik dabiltzan zeure seme-alabak.

† Hildako gure senideak (...),  
eta mundu honetatik Zurekin adiskide joan diran guztiak,  
hartu egizuz bihotz onez zeure zeruan;  
geuk ere sinisten dogu  
zure aintzaren zorion betea izango dogula betiko,  
eurekin batean, Jesu Kristo gure Jaunaren bitartez;  
beronen eskuz emoten deutzazuz  
ondasun guztiak munduari.

HONEN BITARTEZ, HONEKIN ETA HONENGAN  
ZURI, AITA, JAUNGOIKO AHALGUZTIDUN HORRI  
ESPIRITU SANTUAREKIN BATEAN  
OSPE TA AINTZA GUZTIA  
GIZALDI TA GIZALDI GUZTIETAN.

—Amen.

Salbatzaileak agindu ta irakatsiari jarraituz  
bildur barik esan dagigun.

**GURE AITA** zeruetan zarana  
santu izan bedi zure izena,  
etor bedi zure erreinua,  
egin bedi zure nahia  
zeruan bezela lurrean ere.  
Emoiguzu gaur  
egun honetako ogia;  
parkatu gure zorrak  
geuk ere gure zordunei  
parkatzen deutzegun ezkerro;  
ez eiguzu itzi tentazinoan jausten,  
baina atara gagizuz gatxetik.

† Atara gagizuz, Jauna, gatx guztietatik,  
emoiguzu bakea gure egunotan,  
zure errukiari esker  
pekatutik gabi bizi izan gaitezan  
eta estualdietan sendo;  
betiko zorionaren itxaropenean,  
Jesukristo gure Salbatzailea  
noiz etorriko dan zain gagozela.

- *Zeurea dozu erregetza;  
zeureak ospe ta indarra orain eta beti.*

### **BAKE ESKEINTZEA** (Abadeak)

† Jesukristo gure Jauna, zeuk esana da apostoluei 'bakea izten deusuet, neure bakea emoten'; begira zure Eleizearen sinismenari eta ez gure pekatuei, eta zeure gogoa danez, emoiozu eleizeari bakea, emon batasuna, errege bizi zara-ta, gizaldi eta gizaldietan. - *Amen.*

† Jaunaren bakea beti zuekin  
- *Eta zure espirituarekin.*

† Emoiozue bakea alkarri.

Jaungoikoaren Bildotsa,  
zeuk kentzen dozu munduko pekatua: *Erruki, Jauna.*

Jaungoikoaren Bildotsa,  
zeuk kentzen dozu munduko pekatua: *Erruki, Jauna.*

Jaungoikoaren Bildotsa,  
zeuk kentzen dozu munduko pekatua: *emoiguzu bakea*

### **JAUNARTZEA**

† Hona hemen Jainkoaren Bildotsa, hona munduko pekatua kentzen dauana: zoriontsuak honen mahaira deituak:

—Jauna, ni ez naz inor zu nire etxean sartzeko,

baina esaizu hitz bat eta osatuko naz.

## **Jaunartzean**

Hemen gaituzu, Jauna, ogiaren eske,  
bizi behar honetan ahuldu bait gintezke.  
Zure gorputz santua hartu nahi genduke:  
zu barik bizitzerik ezingo genduke.

Munduak behar badau eguzki-argia,  
mendiko abereak, iturri garbia;  
besteok nahi badogu barruko bizia  
beharrezkoa jaku zeruko ogia.

Jauna, zure grazia lagun dakigula,  
ogi hau jan dagigun behar dan bezela;  
Ez ahaztu txarrerako jarriak gaozela:  
arren, zuzen ta leial bizi gaitezela.

## **Jaunartze ondorengoa**

Hartu dogun zerutar janari honek  
emon deigula, Jauna, indar-espirtua,  
espirtu horrek egin eban-eta San Bizente  
zure zerbitzuan zintzo eta martiritzan garaile adoretzu.  
Jesu Kristo gure Jaunaren bitartez.

## **Azken agurra**

Santua dan Jainko gure Aitak santutasunera deitzen  
gaitu. Ez dogu nahikoa lege eta arauak eta ohiturak  
beteteaz. Bere Seme Jesusen jarraitzaile gura gaitu,  
ingurukoentzat ere eredu izateraino. Bilatu daigun, ba,  
Jesusen jarraitzaile izatea gure egunerokoan, Jainkoa  
goretsiz eta senide pobreengana hurreratuz.

## **Azken onespena**

† Jauna zuekin.

—*Eta zure espirtuarekin*

† Bedeinka ta gorde zaizela Jainko ahalguztidunak:  
Aitak eta Semeak † eta Espiritu Santuak.  
—*Amen.*

<b>Kanta</b>	<b>Jaunari</b>	kantu	Gora Jainkoa zeruetan,
barri,			goratu danok eleizetan,
kanta guztiok herriz-herri,			goratu baita aingeruek
kanta Jaunaren izenari,			eta goratu lurrekoek.
mundu guztia poz-kantari.			

† Zoaze Jaunaren bakean.  
—Eskerrak Jaungoikoari.



Egoki da, bai, eta zuzen, bidezko eta sal-ba-ga-rri, no-na-hi eta  
 beti guk Zuri eskerrak e-mo-te-a, Jauna, Aita guz-tiz san-tu,  
 Jainko ahalguzti - dun be - ti - ko ho-ri. Kris-to-ri jarraituz,  
 martiri san-tu-ak, zure izena autortzeko isuri eban o-do-lak  
 argi erakusten ditu zu-re mi-ra - ga-rri-ak: gure  
 zeure ahalmena agertzen do-zu-la-ko, eta indartsu egiten indarrik  
 ba - ko - a, zeure testigu izan da-din, Jesu Kristo gure Jau-na-  
 ren bi-tar-tez. Horregai-tik, zeruko indar guz-ti-e-kin, lurrean  
 beti eta beti goresten zai-tu - gu, Zuri, Jainko guztiz handi ho-ri,  
 e - ten ba - rik kan-ta - tuz: